

Viva debatta davart il proporz en il cussegl grond

La regenza grischuna beneventa elecziuns da proporz a partir da 2018

DA MARTIN CABALZAR

■ **Cun 93 encunter 21 vuschs recumonda il cussegl grond da refusar l'iniziativa da proporz e cun 87 encunter 20 vuschs decida el da sustegnair la cuntraproposta da la regenza per introducir il proporz l'onn 2018.** In'iniziativa populara inoltrada d'in comité independent vul introducir il sistem electoral da proporz gia tar las elecziuns dal cussegl grond da l'onn 2014. La regenza pleda medemamain a favur d'ina midada dal sistem electoral, quai duai dentant succeder pir l'onn 2018. Il cussegl grond ha perquai debattà ier suenter mezdi tant davart l'iniziativa sco davart la cuntraproposta directa da la regenza.

En ses votum introductiv ha il parsura da la cumissiun per politica da stadi e strategia *Bruno Claus* (pld Cuir) infurmà davart las tractativas davart l'iniziativa en la cumissiun. L'iniziativa dal pievel «Per elecziuns gistas» che è vegnida inoltrada l'avust 2011 d'in comité independent pretendia ch'il cussegl grond vegnia elegì tenor il sistem da proporz. Gia per las proximas elecziuns dal cussegl grond che han lieu l'onn 2014 duai vegnir applitgà il proporz empe dal maiorz. Tenor las indicaziuns da las iniziandas e dals iniziants duai l'iniziativa modernisar il sistem electoral grischun. Ella duai procurar che quel saja sin il medem nivel sco quel da praticamain tut ils auters chantuns e sco quel da la confederaziun. Ultra dal chantun Grischun elegia mo pli il chantun Appenzell Dadens ses parlament exclusivamain tenor il sistem da maiorz. Intgins chantuns, sco per exempel ils chantuns Uri ed Appenzell Dador, han in sistem electoral maschadà. Tenor ils iniziants garanteschia l'elecziun da proporz a las singulas partidas ina represchentanza en il parlament chantunal tenor lur forza efectiva e pertmettia era la participaziun da partidas pli pitschnas.



Exponents da pusiziuns differentas: Deputà Bruno Claus, la presidenta da la regenza Barbara Janom Steiner e deputà Jon Pult (da san.).

Il temp è madir per ina midada

Sco quai che la presidenta da la regenza *Barbara Janom* ha declarà ier en il cussegl grond aveva la regenza grischuna gia gi proponì 1996 en connex cun l'iniziativa dal pievel «Pro proporz» sco er a chaschun da la revisiun totala da la constituziun chantunala da l'onn 2003 la varianta dal «model grischun» per ina renovaziun dal sistem electoral. Gia alura haja la regenza vulì ademplir en spezial il giavisch d'ina meglra represchentanza da las minoritads en il parlament, ha sincerà Janom. La midada cuntrada politica pli diversifitgada sajan uss arguments pli fermes per ina midada da sistem.

Regenza refusa l'iniziativa

Malgrà questa tenuta fundamentala positiva envers l'introducziun dal proporz refusa la regenza l'iniziativa dal pievel «Per elecziuns pli gistas». «Sche l'iniziativa vegniss acceptada dal suveran fissan necessarias tant ina legislaziun executiva



cumplessiva sco era grondas lavurs preparatoricas organisatoricas e tecnicas», ha declarà Barbara Janom las resalvas da la regenza. Bleras dumondas sajan anc da sclerir. Per exempel prevesia l'iniziativa da nov ils districts sco circuits electorals. La repartiziun dals circuits electorals sin basa dals districts actuals na cuntentia dentant betg las pretensiuns da la constituziun federala. Uschia stoppia l'uschenumnada «egualitad da valor dal success» da las vuschs vegnir garantida supplementarmain.

La cuntraproposta

Tenor la presidenta da la regenza fissi teoreticamain bain pussaivel da realisar las elecziuns da 2014 tenor proporz. Premissa saja dentant in proceder absolutamain optimal. Tenor l'avis da la regenza n'èsi dentant betg da respunsar da discutir e decider ina dumonda talmain complexa en in rom temporal uschè stretg. Per las elecziuns da 2018 pudes-



FOTOS: Y. BÜRKL

siar ils circuits electorals vegnir fixads da nov. Perquai propona la regenza d'opponer a l'iniziativa ina cuntraproposta directa che prevesa d'introducì l'elecziun da proporz per las elecziuns da 2018, surlaschond al legislatur da reglar fin alura tut ils elements necessaris per in proporz. Cuntrari a l'iniziativa «Per elecziuns gistas» duain ils mandats era vegnir repartids en l'avegnir sin ils circuits electorals e quai correspundentamain a la populaziun residenta svizra. Tar l'iniziativa basa la repartiziun dals mandats sin il total da la populaziun residenta.

Viva debatta cun posiziuns enconuschentas

Tenor deputà *Peter Payer* (ps Trin) è l'introducziun dal proporz stà in dals postulats centralis da la chauma generala da 1818. Tschient onns pli tard vegnia quest postulat finalmain ademplì. La dumonda saja uss sulettamain tgi che gida il pro-

porz a la victoria, il cussegl grond, il pievel u la Dretgira federala. Per Payer n'è betg ina represchentanza politica da scadin valla impurtanta, mabain ina represchentanza sociologica da tuttas gruppas relevantas da nossa societad. *Daniel Buchli* (pbd Stussavgia) crititgescha che la ps sco defensura da las minoritads cumbattia ina represchentanza commensurada da las valladas periferas. En la medema crena dattan era deputà *Gian Michel* (bgd Schons) e *Brigitta Hitz* (pld Churvalda). In ferm pledoyer per il proporz ha era *Jon Pult* (ps Cuir) fatg, accentuond che il sistem actual na saja betg gist damai ch'el discrimineschia las minoritads. *Agnes Brandenburger* (pbd Tschintg Vitg) e ses collega *Ernst Nigg* (pps Tschintg Vitgs) defendan l'argumentaziun da l'iniziativa. Tenor *Phillip Gunzinger* (pld Suot Tasna) prendia il maiorz il megljer resguard da nossa varietad culturala, linguistica e politica da noss chantun. Il privel che las valladas periferas perdian lur represchentanza en il parlament chantunal saja grond.

Tenor *Remo Cavegn* (pcd Razén) sappia l'electur exactamain a tge persuna ch'el dettia la vusch e betg simplamain ad ina partida. *Marcus Caduff* (pcd Lumnezia) è surstà dal slalom politic da la pps e numna il fatg che la pps less era resguardar la populaziun estra tar la repartiziun dals mandats sco «populissim pur». Per *Vincent Augustin* (pcd Cuir) è il sistem grischun il mender sistem pussaivel, damai ch'el violeschia impurtants princips d'in stadi da dretg. Maiorz na saja betg malgist, proporz dentant pli gist.

Sustegn chatta il maiorz plinavant tar: *Rico Stiffler* (pbd), *Andreas Felix* (pbd Tschintg Vitgs), *Livio Zanetti* (pcd Tschintg Vitgs), *Robert Heinz* (pbd Evras),

Il proporz vegn favurisà da: *Andreas Thöny* (ps Tschintg Vitgs), *Jürg Kappeler* (verd-liberal Cuir), *Nicoletta Noi* (senza partida Roveredo).